



Pou Piblikasyon Imedya: 27/02/2022

GOUVÈNÈ KATHY HOCHUL

## GOUVÈNÈ HOCHUL ANONSE PLAN POU METE FEN NAN EGZIJANS POU MASK NAN LEKÒL YO APATI 2 MAS

*Ou kapab wè prezantasyon Gouvènè a [isit la](#)*

Gouvènè Kathy Hochul te anonse jodi a plan pou mete fen nan egzijans pou mask eta a nan lekòl yo apati 2 mas 2022. Gouvènè a te pran desizyon sa baze sou analiz plizyè tandans done kle COVID-19 ak apre konsiltasyon ak ekspè sante ak edikasyon ansanm ak paran, pwofesè ak administratè lekòl yo. Anons lan vini apre chanjman resan tou nan done CDC a itilize pou detèmine risk ak nivo transmisyon nan kominate yo. Lòt mezi pou diminye risk yo ta dwe rete anplas.

"Ak plis Nouyòkè k ap vaksinen, ak diminisyon regilye pandan semèn ki pase yo nan kantite ka ak ospitalisyon Omicron, n ap antre nan yon nouvèl faz pandemi an kounye a. Akoz Nouyòkè yo te leve kanpe, nou ka retire egzijans mask la nan lekòl nou yo nan tout eta a nan tout konfyans," **Gouvènè Hochul te deklare.** "Se yon gwo etap an avan pou timoun nou yo ak kominate yo epi mwen rekonesans pou elèv yo, edikatè yo, ak paran yo pou devouman yo pou kenbe nou tout an sekirite—nou te atenn etap enpòtan sa akoz travay di nou."

New York te fè pwogrè ki enpòtan nan konba kont COVID-19 la. Pami gwo eta yo, New York gen pouvantaj ki pi wo pou adilt ki vaksinen nèt pou COVID-19 la, pouvantaj ki pi wo pou adolesan ki vaksinen nèt pou COVID-19 la, epi dezyèm pouvantaj ki pi wo pou timoun laj 5-11 an ki vaksinen nèt. Eta New York State te eksperimente yon bès 98 pouvan nan ka COVID-19 yo depi vag Omicron an, ak yon tandans bès kontini nan ka yo pandan 51 jou konsekutif.

Kantite timoun ki teste pozitif pou COVID la ap bese nan nivo nou pa t janm te wè anvan elèv yo te retounen soti nan vakans ete a; yè 229 ka te rapòte pa rapò ak yon mwayèn 832 ka pa jou sou 7 jou nan kòmansman an lekòl la. Ospitalizasyon pedyatri yo te bese a apeprè 80 pouvan depi vag Omicron an.

Anvan vakans nan mitan ivè a, yo te voye 4.8 milyon tès bay lekòl yo pou timoun yo ale lakay yo. Yo te voye yon lòt 4.8 milyon tès semèn sa pou elèv yo ale lakay yo lè yo retounen lekòl. Antou, 20.8 milyon tès te distribye nan lekòl yo. Pandan sis semèn ki pase yo, Eta a te tabli 261 sit #VaxForKids, ki pote vaksen an dirèkteman bay fanmi

New York yo pou ede paran ak responsab yo vaksinen timoun ki kalifye yo epi pran dòz siplemantè a.

**Komisè Sante Eta a, Doktè Mary T. Bassett, te deklare**, "Gras ak travay di Nouyòkè yo, jodi a nou kapab leve egzijans mask la pou lekòl yo nan tout eta a. Jan Gouvènè Hochul te di a, n ap rete vijilan pandan New York ap vanse pou pi devan, epi ekip nou an nan Depatman Sante a (Department of Health, DOH) ap kontinye kontwole done yo ak sistèm siveyans ki bay avètisman alavans tankou siveyans dlo ize. Nou kontinye ankouraje tout Nouyòkè vaksinen epi pran dòz siplemantè a, epi n ap travay ak patnè nou yo nan edikasyon nan tout eta a pou asire ke lekòl, pwofesè, ak elèv nou yo gen sipò yo bezwen an pou kenbe klas nou yo an sante epi an sekirite."

**Komisè Edikasyon Eta a, Doktè Betty A. Rosa, te deklare**, "Mwen remèsye Gouvènè a pou lidèchip li. Nan travay ansanm, n ap avanse nan kenbe lekòl nou yo an sekirite pou elèv ak edikatè yo."

###

Lòt nouvèl disponib sou sit [www.governor.ny.gov](http://www.governor.ny.gov)  
Eta New York | Chanm Egzekitif | [press.office@exec.ny.gov](mailto:press.office@exec.ny.gov) | 518.474.8418

[ANILE ENSKRIPSYON OU](#)